

## ARSLANAGIĆA MOST - TREBINJE

P o v o d o m p r e n o š e n j a m o s t a 1970-1972.g.

Izgradnjom hidroelektrane na Trebišnjici došao je u opasnost znameniti Arslanagića most koji po svojoj ljepoti, po arhitektonskim osobinama, po bogatstvu forme ima poseban značaj u balkanskoj arhitekturi XVI. stoljeća. Most je zadužbina velikog vezira Mehmed-paše Sokolovića, sagrađen 1573-1574 godine.

Da bi se spasio ovaj objekt od svjetskog značenja kao spomenik arhitekture, izvršena je 1966. godine njegova demontaža i spremljen je za ponovnu izgradnju na lokaciji 3 i pol km nizvodno pred sam grad Trebinje. Za ponovnu montažu mosta je prilikom demontiranja svaki kamen označen brojem i određeno mu je mjesto u novom procesu montaže i izgradnje. Ponovna izgradnja mosta na novoj lokaciji počela je 1970. godine da već 1972. godine most ponovno uže u svoju funkciju i namjenu.

Sredstvima hidroelektrane na Trebišnjici - Trebinje, u redakciji Zavoda za zaštitu spomenika kulture BiH (koji je dislokacijom i rukovodio), izdana je publikacija u kojoj je prikazan cijeli proces dislokacije objekta kao i prikaz značenja toga objekta kao spomenika kulture. Publikacija donosi napise nekoliko autora koji su i neposredno surađivali u rješavanju problema i u procesu tehničke provedbe dislokacije.

Predgovor (Džemal Čelić) - Tri legende o nastanku Arslanagića mosta (S. Delić) - Značaj prenošenja Arslanagića mosta sa aspekta službe zaštite spomenika kulture u svijetu i kod nas, (Ivan M. Zdravković) - Spomen ljudskog stvaralaštva, spoj sredozemlja i istoka (Crito Fisković). - Arslanagića most i njegovo mjesto u kulturno-historijskoj baštini Bosne i Hercegovine (Džemal Čelić). - Četiri vijeka poslije prvog građenja Arslanagića most je morao da savlada još jedan proces nastajanja (Milan Gojković, Salih Čenmagić) - Uloga HE na Trebišnjici u akciji spašavanja spomenika kulture u fazi izgradnje hidroenergetskog sistema na Trebišnjici. (Marijan Siović). - Bibliografija.

Na završetku popis novih ustanova i stručnih suradnika koji su učestvovali na prenošenju mosta.

Publikacija je opremljena sa 28 ilustracija, geografskom situacijom, nacrtima, presjecima i predstavlja interesantan i vrijedan dokument jedne akcije koja našoj službi zaštite daje jednu međunarodnu afirmaciju. Upozoravamo muzeje i zavode da se za ovu publikaciju obrate direktno na adresu Hidroelektrane na Trebišnjici - Trebinje.

A.B.